याकोब

याकोब लिहि कीता चिटि

इद चिटितुन बारेता गोस्टि

लिहि कीतोना पोरोल: याकोब

लिहि कीता साल: किरिस्तु सकम लग-बग चालिस सियुनल्ते पनस (45–50) सालकुन नड्डम लिहि किय्वल जर्गा. मुके गोस्टि: अद गट्कते याकोब इंवल पोरोल वेलेटिरकुन मत्ता. वीर्गटल वेर याकोब येसुनोर तमुर आंदुर. येसु पिसि मनेके, वेर याकोब वोन्गा बरोसा इमिक बित, सासि-नेंड्ता पेजे, वोर येसु करलेन बगवंतनोर मिर आंदुर इन्जेर सूड्सि, किर कीसि बरोसा इर्तीर.

मरट तक्लिब्बनङ परिक्सन वोर्चि मुने ताक्तेके, बगवंतन पोरो करल बरोसा मंता इंवल दुसुरकुन करे मांता. चर्चितुर सङा अनि बहिडुर लोकुर सङा मंवल तरिका सूड्सि, करल बरोसतुन बारेते किर किया वचो. किय्वलिक काम्क अनि वड्क्वलिक गोस्टिन हिंदल, करल बरोसा मंता कि सेले इन्जेर माकुन करे मांता. करल बरोसतुन बहन किर कियना इंवडुन बारेते इद चिटितगा मंता.

बगा बतल मंता

बरोसा अनि बुदि-गियन 1:2-8
गरिब अनि दनेवंतल 1:9-11
करब गुन्क बगवंतनल वायोङ 1:12-18
सते गोस्टितुन केन्चि अद गोस्टि तीर काम किय्वल 1:19-27
चुडुर-पांदे सूड्वा 2:1-13
बरोसा अनि काम कीसि तोह्वल 2:14-26
मीवा जरक्ने मनल वेन्जेडुन करुसट 3:1-12
बुदि-गियन वालिर 3:13-18
बगवंतन करुम वरट 4:1-12
डगुक डगुक गोस्टिङ पोडि कीसि वेह्मट 4:13-17
दनेवंतलिरकुन दाक सिय्वल 5:1-6

बगवंतल अनि येसु किरिस्तु पर्बुनोर सेव्कल याकोब्ना
 आंदुन. दुनिया पूरो पग्ने मासि मंवलिर बगवंतनुर बक्तलिर्कुन* दंडोस दोसि, इद चिटि लिहि कीसेर मंतोन.

बरोसा अनि बुदि-गियन

2-3 नावुर दादिलर-बायिक्निट! मीकुन तिक्लब्क अनि दुक्सङ वातेके गिर मिरट वेले आनंद्ने मंट. बरोसते अव तिक्लब्क अनि दुक्सन मेय्सि मुने सोतेके, मीकुन उंडे इचुर वोर्च्वलगुन अब्बंता इन्जेर मीकुन टावये. ⁴ मिरट वोर्च्वल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतिट.

⁵ मिह्गटल बोने बुदि-गियन सेल्वेक वोर बगवंतन कोरना. अहन कोर्तोर वोन, राङि सिय्वक्ने कोर्ततुन तेर अदिक सिय्वल बगवंतल आंदुर. ⁶ बति बगवंतन कोर्नेके, सींतोरो सियोरो इन्जेर अनुमानम्ना बरोसते तल्क्मट. अनुमानम्ने तल्क्वल सम्दुर्तङ हेल्वङ बहन विडिदे तेदंतङो अहन मंदंतोर. ⁷⁻⁸ आतोर रंड तीर्क्नेसोन्च किय्वल मायनल तंवा सर्दगा बस्केन बरोबर ताका परोर. अदेन साटि पर्बुनगटल तनकुन उंडे बतय पुट्मड मंदर इन्जेर आतोर आसा किय्वा.

गरिब अनि दनेवंतल

⁹ गरिब बक्त लिर तमकुन बगवंतल सीता डगुर-पांदुन पिय्सि, आनंद्ने मंदा लागर. ¹⁰ बति दनेवंतलिर बक्त लिर तमकुन बगवंतल सीता चुडुर-पांदुन पिय्सि, आनंद्ने मंदा लागर. बारितेके वूर गिर जाडिता पुङडुन दात साया लागर. ¹¹ पोड्द पेसियंता, अद येदिते जाडि वतंता इंवल माकुन टावये. जाडि पुङडा सोबता रूप करब आंता. अहने दनेवंतलिर बक्त लिर गिर तम्बङ काम्क कीसेर, मनेकेन नासेडम आंतेर.

करब गुन्क बगवंतनल वायोङ

12 दुक्सङ वानेक अवन वोर्चि मेथ्सि, मुने सोंवलिर बक्तलिर आसिर्वाद्येतंतेर. तनकुन पेमा किय्वलिरकुन बगवंतल वाग्दन सीतोर अद जीवता किरिट दुक्सङ वानेके, बरोसतगा गट निल्तुरकुन पुटंता. 13 बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इंवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. 14 बति हर मायनल तंवा कसुर कियना इंवल बुदिते, नियतुन बह्के मासि करब्ना आसतगा कोंडे मातोर. 15 आतल करब्ना आसा पिंडमुन दात बडे मासि, पाप इंबडुन जल्मा सींता. अद पाप बेर्सनचोर बेर्सि, आत्मता सावदुन जल्मा सींता.

¹⁶ नावुर लाइनुर दादिलर-बायिक्निट! मिरट पसे माय्मट. ¹⁷ हर उंदि चोकोट्ना अनि पूरो बर्पुर वाले वस्तु, स्वर्गगा मंवल बगवंतनल वासेर मंता. वोरे बाबो हाबडगा वेड्चि सिय्विलकुन निब्डि कीतोर. अव वस्तुना वेड्चिते दड्मि मारियंता, बित बगवंतल बस्केट्के मारियोर. ¹⁸ बगवंतल तंवा सते गोस्टितुन हिंदल तना निब्ड कीता कलितगा मरट पंटता मोदोडा ईसतुन दात* मंदना इन्जेर मिय्तोर.

सते गोस्टितुन केन्चि अद गोस्टि तीर काम कियवल

19 नावुर लाइनुर दादिलर-बायिक्निट! इद गोस्टितुन करि कीम्ट. हर मायनल केन्जले तयर मंदना अनि वड्कनेक सोन्च कीसि जोक्सि वड्कना. वेय्ने सोडुन वाय्वा. 20 बारितेके मायना सोङ बगवंतल इचा किय्वल, नियत्ना सिर ताकुसा परो. 21 अदेन साटिने मिह्गा मंवल करब-पांदुन अनि बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्टितुन पिय्सि ताकट. इद गोस्टि मीकुन बचि किया परंता.

22 बगवंतना वचन सिरिप केन्ज्वले आयो बित, अद वचन वेहता तीर ताकना. अहन ताक्वेक मीवा मिरट मोसेम कीतुर आंतिट. 23-24 बगवंतना गोस्टि केन्चि, अद गोस्टि तीर कियोर बोर मायनल आर्सतगा तंवा मोकोम सूड्सि, तना बहन मंतोरो इंवल बिह्र सोन्जि, येंटने मरुड्वन दात मंदंतोर. 25 बित बगवंतना वचंतुन दिहंते सूड्तेक तान्गा बतय किम सेले. पर्जतुन अद मोक्डो सुटि कियुसा परंता. अदेन साटि बोर्ते मायनल अद वचंतुन केन्चि, अद वेहता तीर कींतोरो, अद वचंतुन वोर बस्केन मन्गीर बित अद वेहता तीर पिसंतोर. आतोर मायनल बद काम कीतेक गिर बगवंतल वोन आसिर्वाद सीतोर. 26 बोर्ते तंवा तनय बक्तना इन्जेर वेहचेर, तंवा वेन्जेडुन जरबने इरा परोरो, वोर तंवा तनकुन मोसेम किय्वल आंतोर. बोना बिक्त बततुने कामि सियो. 27 रांडे वेय्लोकुन अनि पोसटि मिर-मियडुन तक्लिब मनेके, वूरकुन मदत किय्वल बक्तितुने

^{* 1:1} बगवंतनुर बक्तलिरकुन इत्तेके, बारा कांदनुर यूदुल्क्ना जातितुर लोकुर इन्जेर ग्रीकु बासते मंता. * 1:12 जीवता किरिट इत्तेके स्वर्गगाबस्केट मंवल जीवा सेलेक मोक्सेम. * 1:18 यूदुल्क पंडुस्ता पंटता मोदोडा ईसा बगवंतनय आंद.

बगवंतल कोर्सेर मंतोर. अह्ने इद दुनियता पाप तनकुन तुंड्वक्ने सुदुड मंवल बक्तितुन गिर बगवंतल कोर्सेर मंतोर. इहिन कल्ति सेल्वक्ने मंवल बक्तिये करल बक्ति आंद.

चुडुर-पांदे सूड्वा

2 नावुर दादिलर-बायिक्निट! मय्मते जगा जगा मिड्चेर मंचल, येसु किरिस्तु पर्बुन पोरो बरोसा इर्विलर मिरट, बोने बेद-बाव्ते सूड्मट. ²नमुनतुन वोरोर मायनल सोनेतड़ मुदङ अनि बारितङ किष्डिङ केर्सि अनि उंडे वोरोर माक्डे मातङ किष्डिङ केर्सि, मिरट मीरे माय्वल रोतगा वातेर इंटु, ³-⁴ अस्के मिरट बारितङ किष्डिङ केर्सि सजे मासि वातोन सङा, "दादा! निमे इद चोकोट्ना कुर्सितगा उदा" इन्जेर वेह्निच, गरिबुन सङा, "निमे अगा निला सेलेके इंगे बूड उदा" इन्जेर वेह्तेके, मिरट बेद-बाव तोह्चि, करब बुदिते तस्वा कीतुर आंतिट.

⁵ नावुर लाड्नुर दादिलर-बायिक्निट! इद गोस्टि केन्जट. इदेन मुनेन तनकुन पेमिते बक्ति किय्वलिरकुन तंवा राज सींतोन इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंविलरकुन बरोसतगा दनेवंतिलर कींतोर. अनि वोरे तंवा राज्ना ईसा येतना इन्जेर वूरकुन नेमि कीतोर. ⁶मिरट वीर गरिब लोकुरा हिजत वोसेर मंतिट. बति मी पोरो अदिकार ताकुसेर, मीकुन कोट्क्नगा* हिल्ल किय्वलिर वीर दनेवंतिलरे आंदिर कि आयुर? ओहो, वीरे आंदिर! ⁷मिरट बक्ति किय्वल किरिस्तुना चोकोट्ना पोरोडुन रेह्नि वड्क्विलर वीरे दनेवंतिलर आंदिर कि आयुर? ओहो, वीरे आंदिर!

8"नीवा नीकुन पेमां कीतपे नी आजु-बाजुतुरकुन गिर पेमां कियना" इंवल दर्मा-ग्रंत्नमुके हुकुमुन मिरट पिय्सि ताक्तेके, अद चोकोट्नय गोस्टि आंद. 9 बित उदि मोका मिरट बेद-बाव तोह्किट्ते, दर्मता कानुंतङ हुकुमकुन पिय्सि बय्मन आसि पापिर आंतिट. 10 बारितेके बोरे आयि अद कानुंतगा मंवलिक सम्दो हुकुमकुन पिय्स ताक्सेर, उदि हुकुमुन टूटि कीसि ताक्तेक गिर, वोर पूरो दर्मता कानुंतङ हुकुमकुन पिय्स ताक्मिक इंवल बद्नम आंतोर. 11 बारितेक "पीर किय्वा" इन्जेर वेह्तोर अदेन साटि वोरोर मायनल पीर किय्वेक गिर उदि मोका बोनय जीवा यत्तेक, वोर अद कानुंतङ हुकुमकुन बय्मन आसि ताक्तोर आंतोर.

12 अदेन साटि माकुन मोक्डो सुटि किय्वल कानुंतुन पिय्सि, वड़क्ततुन हिंदल अनि काम कीततुन हिंदल बगवंतल तस्वा किय्वल मंतोर इन्जेर दिहंते ताकना. 13 बारितेके दुसुर पोरो दया तोहुर वूरकुन बगवंतल तस्वा कीनेके, वूर पोरो गिर दया तोहोर. बति बूर्त दुसुर पोरो दया तोहंतेरो, बगवंतल तस्वा कियन नेटि बूर वेले संतोस अनि आनंदने मंदंतेर.

बरोसा अनि काम कीसि तोह्वल

14 नावुर दादिलर-बायिक्निट! "नाकुन येसु किरिसतुन पोरो बरोसा मंता" इन्जेर वोरोर मायनल वेह्तोर इंटु बित, अद बरोसा मत्ता तीर काम किय्वेके, आतल बरोसा बततुने कामि सियो. आतल बरोसा माय्नन बिच किया परंता कि बतल? बिच किया परंता कि बतल? बिच किया परो. 15 नमुनतुन वोरोर दादले आयि, सेलेके उंदि बायिय आयि, तिंले तिंडि सेल्वक सेलेके, पोंड्ले किंडिंड सेल्वक मत्तेर इंट. 16 अस्के मिरट वोर दादन सेलेके, अद बायिन बतय मदत किय्वक्ने, वूर सङा, "सांतिते सोन्जि, पेटिमेन तिंटु अनि मेंदोल-मेन किंडिंड पोंडट. अस्के मीकुन गर्मि वांता. इव सम्दो मीकुन बगवंतल सींतोर" इन्जेर सिरिप गोस्टिनेन वेह्तेके बतय पाय्दा पुटो. 17 अदे तीर्दे बरोसा मंता इन्जेर वेह्चि, बरोसा मत्ता तीर काम किय्वेके गिर आतल बरोसा वोंटिर आसि सांता.

18 बित नमुनतुन बोरे ना सङा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नङ काम्क कीसि तोहंतोन्» इन्जेर वोन वेह्चि, «नीवा बरोसतुन काम किय्वक्ने तोहा पर्कि कि बतल?» इन्जेर पूसि कींतोन. 19 बगवंतल वोरोरे मंतोर इन्जेर निमे बरोसा किय्वल चोकोटे बित, बतल पाय्दा? अहन बूक गिरे बरोसा कीसेर, वेरिसि तरा तरा आसेर मंतङ.

20 एहे पिसिटि! काम कीसि तोह्वक्ने मंवल बरोसा बततुने कामि सियो इंबडुन गवा पह्जे कि बतल? 21 मा तोत्तोर बाबो अब्राहमुन हेतु कीम. वोर तंवोर मिर इसकुन बिलदान सिय्वल बोवलत पोरो बिल सिय्ले आनेकेते, बगवंतल वोना कार्यतुन सूड्सि, वोन नियत्तोर इन्जेर वोप्तोर कि सेले? 22 वोना बरोसतुन केय्दे कीसि तोह्वल मिरट किर कीतिट कि सेले? वोर तंवा बरोसा बातल इंवल केय्दे तोहतोर. 23 "अब्राहम बगवंतन पोरो बरोसा इर्तोर अदेन हिंदले वोन नियत्नोर इन्जि बगवंतल वोन्नोर" इंवल दर्मा-ग्रंत्नावचन पूरे माता. अद तरिकते अब्राहमुन बगवंतनोर सोप्तल इंवल पोरोल

वाता. ²⁴ इद सूड्सि, मायनल सिरिप तंवा बरोसतुन हिंदल आयो बति, तंवङ कामकुन हिंदले, नियत्नोर इन्जेर बगवंतल वोप्तोर इंवल मिरट करि कींतिद.

²⁵ अदे तीर्दे, राहबु[#] इंवल लन्जे वेय्लो इज्रयेल देसुर कब्रियलिरकुन तंवा रोन मकुसि, सम्दो मान-मर्यदा कीसि दुस्रो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोप्तोर. ²⁶ बहंते परन सेले अद मेंदोल साता लेकते वांतयो, अह्ने चोकोट्ना काम कीसि तोहुर वूरा बरोसा गिरे साता लेकतेन वांता.

मीवा वेन्जेडुन जरब्ने मनल करुसट

3 नावुर दादिलर-बायिक्निट! मिह्गटल वेलेटिर बोदा वेहविलर आय्मट. बारितेके बोदा वेहविलर माकुन वेले किटिंता तस्वा मंदंता इंवल मीकुन टावये. 2 मरट सिन्दर गिरे बचोड़ो गल्तिङ कींतट. तना वड्कविलक गोस्टिनगा उंदि गिर तप कियोर वोर बर्पुर गुन वाले मायनल आंतोर. आतोर मायनल तंवा पूरो मेंदोडुन जरू इरा परंतोर. 3 मरट ताकुस्ता तीर ताकना अनि मावा जरू मेंदना इन्जेरंते कोंदन वेसुनि दोहंतट. 4 अहूने डगुर रूकता नमुना येत्तेक गिर, बेय जोर्ते विड वासि तान दुर्सर वोंता. बित तान ताकुस्वल मायनल अद रूकतुन पेजे मंवल चुडुिस कटेतुन तिरुस्तेक, तना बेके सोंदना इत्तेक हके तान मलुसा परंतोर. 5 अहूने वेन्जेर मावा मेंदोडगा चुडुिस बागम आंद. बित अद बेय इगुक डगुक गोस्टिङ वड्कता. अदे तीर्दे, चुडुिस मिन्गुल डगुर केडतुन बचोर-बहन डुंडुसंतयो सोन्च कीम्ट.

6 मावा वेन्जेर गिरे उंदि तहमित दात्नय आंद. करब्ने निन्च मंवल मावा मेंदोडगा उंदि बागम आसि मंता. अद वेन्जेर करबुन पूरो मेंदोडगा पग्नि कीसि, मायनना जिन्गनितुन तहमित दात लावि कीता. अहन लावि किय्वल सिक्ततुन अद वेन्जेर पातइतल* येतंता. 7 सिन्द जंवरकुन, पिटे-पुरडुन, पुर्ग-बुसितुन, सम्दुरतगा मंवलिक जिन्नस सम्दोतुन इदेन मुने अनि इंके गिर मायनल जरब्ने इसेरेन मंतोर. 8 बति वेन्जेडुन इंके वेरि बोरे तंवा जरब्ने इरा पर्मिक. अद वेन्जेर जीवा तेंड्वल विक्ने निन्च अविवक्ने करब कीसेरेन मंदंता.

⁹ इद वेन्जेडेन मरट पर्बु आय्वल बाबो बगवंतन डगुर-पान सींतट. इदे वेन्जेडे बगवंतना रूप्ने पुट्तोर माय्नन सापेना सींतट. ¹⁰ आसिर्वास्त्रनि सापेना उंदिय तोड्दल बहिर वासेर मंतङ. नावुर दादलिर-बायिक्निट! अहन मरट मंवा. ¹¹ सोवोर येर अनि चोकोट्ना येर बस्केट्के उंदि जलतल पूटे मायोङ. 12 नावुर दादिलर-बायिक्निट! अन्जुरि मरतुन मर्का पंडिङ* बस्केट्के सादोङ. अहने आङुर वेलितुन अन्जुरि पंडिङ बस्केट्के सादोङ. अदे तरिकते, सोवोर येता जलतल चोकोट्ना येर पूटे मायो.

बुदि-गियन वालिर

13 बुदि-गियन वालिर अनि समजदार्क मी रोपो बोरे मंतेर कि? अहन मत्तेके वूर सते-पांदे ताक्सेर, बुदि-गियन सीता अद चुडुर-पांदुन पिय्सि, वूरङ कार्यन तोहट इंट. 14 उंदि मोका मीवा दिलतगा कुटा कुटा अनि लाल्सल गुंते मन्जि, इगुक डगुक गोस्टिङ वेहचेर सतुन मकुसिय्मट. 15 मिहगा मंवल ईतल बुदि-गियन स्वर्गनल रेय्सि वाय्मिक. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सय्तंदा बुदि-गियन आंद. 16 बहन इत्तेके बगते कुटा कुटा अनि लाल्सिलक गुन्क मंदंतङो, अगा जगडङ लोलिङ अनि सम्दो तीर्क्नेक्करब काम्क मंदंतङ.

¹⁷ बित स्वर्गनल वाय्वल बुदि-गियन वेले पिवत्रा आंद. अद बुदि-गियन सांतितुन पेमां कींता. अद बोने बतय इंवक सादु आसि मंदंता. अद बुदि-गियन वेहता तीर केन्जंता अनि दयते सूडंता. अनि अद चोकोट्नड काम्क कीसर बेद-बाव तोह्वक मंदंता. अद बुदि-गियन सतेमुन पिय्सि ताकंता. ¹⁸ सते-पांदे अनि सांतिते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

बगवंतन करुम वरट

मिह्गा जण्डङ अनि लडेय्क बततुन हिंदल जग्सेंरमंतङ? मीवा दिलतगा पुट्वलिक आसन उंदितुन उंदि अर्सि वाय्वा सोन्जिने इव जग्सेंरमंतङ. ² मिरट आसा कीकिट बति, अद मीकुन पुटो. अद कुटा कुटा गुंता आसतुन साटि माय्नन जकंतिट. जण्डङ अनि लडेय्क कींतिट बति, आसा कीकिट अद मीकुन पुटो. मिरट कोर्ता अद मिह्गा मनो. बारितेक बगवंतन मिरट तिल्क्वट. ³मिरट बगवंतन तल्केके गिरे अद मीकुन पुटो. बारितेके मीवा सुक-बोगुन साटि किच्ले कर्ञना आसते तल्कंतिट.

⁴ इद दुनियतङ सुक-बोगुन सङा दोस्तन कीतेके, बगवंतन पर्मा कीतप आयो बित, पीर कीतप आंता इंवल टावा सेले कि बतल? इद दुनियतुर सङा दोस्तन कीका इंवल, बगवंतन

^{* 3:3} ग्रीकु बासते इहिन लिहि कीसि मंता: कोडता मुस्कुरितुन लगम दोहंतट. * 3:4 तेलुगुते अद चुडुसि कटेतुन «चुक्कानि» इंतेर. * 3:6 पातड्तल सेलेके सय्तंदल इन्जेर मंदंता. * 3:12 ग्रीकु बासते ओलिवा पंडिङ इन्जेर मंता.

पगा-दारल आंतोर. 5 "बगवंतल मा सम्दिरकुन सीता, अद आत्मते मरट तंवय बक्ति कियना" इन्जेर दर्मा-ग्रंत्नगा,विट आगमे लिहि कीसि मंता इंतिट कि बतल? १ बगवंतल माकुन वेले पेर्मता-दयते सूड्सेर मंतोर. अदेन साटिने दर्मा-ग्रंत्नगा,

"बगवंतल गर्वते मंवलिरकुन उल्टा तिरियंतोर.

बति कमि-पांदे मंचलिर पोरो पेर्मता-दया तोहंतोर"# इन्जेर लिहि कीसि मंता.

⁷ अदेन साटि, बगवंतन मुने चुडुर-पान कीसि मंट. सय्तंदुन उल्टा तिरियट. अस्के वोर सय्तन मिहगटल परर आंतोर. ⁸ बगवंतन करुम वरट. अस्के बगवंतल मी करुम वांतोर पापेस्तलिर्निट! मीवङ पापकुन नोरट. बह्के मातुर्निट! मीवङ दिलकुन सुदुड-पान कीम्ट. 9पापेस्तलिर्निट! विचर्ते अनि दुक्सते मंट. जोर्ते आडट. कव्वडुन बद्लि आड्सेर अनि आनंदुन बद्लि दुक्सते मंद. 10 पर्बुना नदुडुन मुने मीवा मिरट चुडुर-पान कीसि मंट. अस्के पर्बु मीकुन इगुर-पान सींतोर 11 दादलिर-बायिक्निट! मीवा मिरट वोरोन वोरोर बय्मंते राङ्मट. तंवोर सोप्तन राङ्गि सीतेक आयि सेलेक वोन पोरो तस्वा कीतेके आयि, वोर मायनल दर्मता कानुंतुन बय्मन आतोना लेकते वांतोर. मीवा काम सिरिप अद कानुंतुन पिय्सि ताकना. अद कान्न चोकोट्ना सेलेके वायुट्ना इन्जेर तस्वा किय्वल मीकुन हक सेले. 12 पर्जतुन पोरो नाय्दा तस्वा किय्वल अनि दर्मता कानुंतगा हुकुम्क लिहि कियुस्वल वोरोरे बगवंतल आंद्र. पर्जतुन बचि किय्वल अनि नासेडम किय्वल गिर वोरे आंदुर. ते आजु-बाजुतुर पोरो सिक्सा वाटट इन्जेर वेह्ले नीकुन बोर अदिकार सीतोर?

डगुक डगुक गोस्टिङ वेह्मट

13 केन्जट! "नंड सेलेते नाडि बत्तर उंदि चहर्दे सोन्जि, अगा उदि साल वेरि मंदतोम. वरट! अगा बेपिर कीसि कोतड़ वेले कमय कीकट" इन्जेर वेहवलिर्निट करि कीम्ट. 14 नाडि बतल जर्गंतयो मीकुन टावा सेले. मीवा जीवतुन बारेते सोन्च कीम्ट. मिरट जुलुक दिसि उंडे जुलुक्ने मयड आसि सोंवल, पोयता दुहरतुन दात्नुर आंदिट. 15 अहन इंवडुन बदलि मिरट, "पर्बु जीवते इर्तेके, इद कीकोम अद कीकोम" इन्जेर वेहना. 16 बति मिरट अहन किंग्विट. लांडि-लबड डगुक डगुक गोस्टिङ वेह्चेर गल्तिङ कींतिट. 17 अदेन साटि चोकोट

कियना इंवल, टावा मन्जि गिर चोकोट कियोर वोन पाप लागंता.

दनेवंतलिरकुन दिनक सिय्वल

5 के लियट. बारितेके मीकुन गाचर गंडल्क वाय्वलिक मंतड. 2मीवा दन-द०लत कडियंता अनि मीवङ पाङुक वेलुम पियंतड. 3मिह्गा मंवल सोने अनि कूरा चिलिम पियंता. अद चिलिम मी पोरो उल्टा गवा वेह्चि, मीवङ मेंदोलकुन तड्मित दात डुंडुसंता. इव आक्रितङ दिवोस्क्ने गिरे मिरट वेले दन-द०लत्ना डीग वाड्सेर मंतिट. 4केन्जट! मी वहुक्नगा काम किय्वलिर बूय्तलिरकुन, मिरट बूति सिय्वक्ने पसि कीतिट. वूरङ बूतिङ मी पोरो पिरदि कीसेर मंतङ. वूर बूय्तलिरा आड्वल स्वर्गा दलम्नोर पर्बुनङ केवकुन केन्जा वाता. 5 बोमित पोरो मीकुन पसंद वाता तीर सुक-बोग्ने पिसेर, कोय्वल दिनमुन साटि, मीवङ दिलकुन कोडचुसि तयर कीसेर मंतिट. 6 मिरट नियत्ने ताक्वलिरकुन सिक्सा वाट्सि, वूरकुन जिल्ट बित, वूर मीकुन मर्ला बड्मिक.

सम्दोतुन वोर्चि मुने दायना

7 अदेन साटि दादिलर-बायिक्निट! पर्बु मिल्स वानल वेरि, मिरट वोर्च चोकोटे सूड्सेर मंट. बहन इतेके, वोरोर केतिदारल तंवा बोमितगा वाट्वल चोकोट्ना पंटतुन साटि, बहन सूड्सेर मंदंतोरो दिहंते करि कीम्ट. वोर केतिदारल मोदोड़ा पिर वासि* पंटा पिरंता अगटलते बेर्सि, पंटा कोय्ले वानल वेरि वोर्चिकुन चोकोटे सूड्सेर मंदंतोर. 8 मिरट गिर मंदुन गट कीसि, वोर्चि सूड्सेर मंट. बारितेके पर्बुना मिल्स वाय्वल वकत करुम वासेर मंता. 9 नावुर दादिलर-बायिक्निट! वोरोन पोरो वोरोर चिह्डिङ वेह्मट. अहन वेह्तुरकुन पर्बु सिक्सा वाटंतोर. केन्जट! वोर नाय्दा तस्वा किय्वल अदिकारि वेय्ने वाय्वल मंतोर.

¹⁰ नावुर दादिलर-बायिक्निट! पर्बुन बारेते वेह्तुर पर्वक्तिलर तिक्लब्क बोगे मातेर. वूर पर्वक्तिलरा नमुना येच्चि मिरट ताकट. ¹¹ तिक्लब्क वोर्चि बरोसते ताक्तुरकुन आसिर्वासेतुर इंतट. योबुना वोर्च्वलगुंतुन बारेते केन्चि मंतिट. पर्बु वोन आक्रित बातल इनम सीतोर इंवल मिरट सूड्तिट. पर्बु वेले

[े] **5:4** स्वर्गा दलम्नोर पर्बुनङ इत्तेके सक्ति वाले बगवंतल. 🌁 **5:7** अद जागतगा उर्सन वकत्ने जरिस पिर वांता अनि पंटा कोयन मुने बेय पिर वांता.

[#] **4:6** गियंतङ गोस्टिना 3:34

दया अनि किंबुल वाले आंदुर. 12 नावुर दादिलर बायिक्निट! सम्दिन तेर मुके बतल इत्तेके, स्वर्गा पोरोडेन आयि, बोमिता पोरोडेन आयि, उंडे दुस्रो बततय पोरोडेन आयि, मिरट वोट वाट्वा. सिरिप बतल मंता अद बेहट. अहन मत्ता तीर वेहतेकेन बगवंतल मीकुन सिक्सा वाटोर.

13 मिह्गटल बोरे आयि तिक्लब्क्नगा अर्सि मत्तेके, वोर पार्तना कियना. आनंदने मत्तोर वोर, बगवंतन पार्तना-विंति कीसेर पाटङ वारना. 1⁴ मिह्गटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. 15 अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कींतोर. उंदि मोका वोर पाप्क कीसि मत्तेके, वोनङ पापकुन पर्बु मापि कींतोर. 16 अदेन साटि बवे पाप्क कीसि मन्किट्ते, बोनङ वोहक पाप्क मी नड्डुम मिरट

बोपट अनि वोरोन साटि वोरोर पार्तना कीम्ट. इदेन हिंदल, मीवा तबियत चोकोट आंता. नियन्नोना पार्तना वेले सक्तिते मन्जि बचोरो चोकोट किया परंता.

¹⁷ येलियल मा दात्नोरे सादरन मायनल आंदुर. पिर अर्वा इन्जेर तंवा मंदे पार्तना कीतोर. ते सड़े मूंद साल्क वेरि, बोमित पोरो पिर अर्मिक. ¹⁸ अद आता पेजे पिर अरना इन्जेर मर्ला पार्तना कीतोर. अस्के हाबर पिरदुन अरुस्ता अनि बोमि तन्गा उस्तंडपंटङ पंडुस्ता.

19 नावुर दादिलर-बायिक्निट! मिहगटल बोरे आयि सते सरदुन बहके मातेके, वोन मिल्स सत्नगा तत्तेके इद गोस्टितुन किर कीम्ट. 20 पापेस्तन पाप्ना सरितल सते सर्दे मलुस्तोर बोर, पापिना आत्मतुन मरंतल तपुसि, बिच कियुस्तोर आंतोर. इदे आय्वा पापिनङ पापकुन बगवंतना केय्दे वोर मापि कियुस्तोर आंतोर.